



Komunikadu Imprensa
Tribunál Distritál Dili
22 Jullu 2016

**Tribunál kondena arguidu kazu abuzu seksuál hasoru labarik tinan 4 simu
pena prizaun tinan 6 fulan 8**
JSMP: desizaun ne'e dook hosi justisa ba vítima

JSMP preukupadu ho dezisaun Tribunál Distritál Dili, ba kazu abuzu seksuál kontra labarik ho idade tinan 4, ne'ebé hala'o iha 13 Jullu 2016. Tribunál kondena arguidu ho pena prizaun tinan 6 fulan 8 tanba provadu komete krime abuzu seksuál hasoru lezada iha 03 Maiu 2015, iha tuku 14:00 loro-kraik, iha Distritu Likísa.

“Desizaun ne'e dook no la justu teb-tebes ba vítima ne'ebé sei ho idade ki'ik teb-tebes no desizaun ne'e hatudu katak tribunál falla atu kompriende situasuan labarik ne'ebé ho idade ida hanesan ne'e,” dehan Diretór Ezekutivu JSMP, Luis de Oliveira Sampaio.

JSMP hanoin katak sentensa ne'e la'os deit la atinze pena másimu ne'ebé loloos tenke agrava ba tinan 26 fulan 6 iha prizaun. Maibé importante liu ida-ne'e mak desizaun ne'e lajustu tanba hasoru labarik ne'ebé nunka bele akontese. Iha kazu ne'e tribunál eskolla deit pena mínimu tinan 6 fulan 8 hodi kondena arguidu.

Tribunál konklui katak arguidu prova kontra artigu 177 (1) Kódigu Penál kona-ba prátika koitu vajinál, koitu anál ka koitu orál ho labarik ne'ebé seidauk tinan 14 ho agravasaun tuir artigu 182 (1) letra (a) Kódigu Penál tanba vítima ninia idade ki'ik liu tinan 12.

Tribunál prova katak arguidu komete duni krime abuzu seksuál hasoru lezada hanesan faktu sira iha akuzasaun laran, depoimentu hosi lezada no testemuña nain rua. Aleinde ne'e, iha mós prova dokumentál sira hanesan fotografía no relatóriu médiku hosi ospitál ne'ebé hatudu katak iha kanek ki'ik (*luka lecet*) iha lezada nia orgaun seksuál.

Ministériu Públiku akuza katak arguidu bolu lezada ne'ebé halimar hela iha nia tian ki'ik nia uma atu sira nain rua ba ku'u goiavas. Lezada aseita no sira mós ba liuhusi mota. Wainhira to'o iha mota, arguidu husu ba lezada atu halo relasaun seksuál maibé lezada hatan katak lakohi. Arguidu obriga hasai lezada nia ropa, hatama liman ba lezada nia orgaun seksuál, kous lezada no konitnua kose nia orgaun seksuál ba iha lezada nia orgaun seksuál. Depoizde ne'e arguidu haruka

lezada ba haris tiha iha mota. Aktu abuzu seksuál ne'e rezulta lezada senti moras iha nia orgaun seksuál.

Depoizde fila hosi mota, lezada heteten ba nia tian sira kona-ba saida mak arguidu halo ba nia iha mota laran no nia tian ba halo kedas keixa ba iha polísia.

Labarik sira nu'udar grupu ne'ebé vulneravel teb-tebes no fasil liu ba sira atu sai alvu ba arguidu sira. Tanba ne'e JSMP husu atu sentensa ba arguidu sira tenke ekilíbrui ho arguidu sira nia hahalok hodi kontribui ba prevensaun krime hanesan iha sosiedade no hatudu pozisaun forte estadu nian katak estadu hakribi no kondena maka'as kualker forma aktu abuzu seksuál kontra labarik.

Estadu Timor-Leste ratifika ona Konvensaun Direitus Labarik atu proteze labarik sira. Iha artigu 19 hosi Konvensaun ne'e defini katak "Estadu Parte sira sei foti medidas lejislativa, administrativa, sosial no edukasionál hotu-hotu ne'ebé apropiadu atu proteze labarik sira hosi kualker forma violénsia fiziku, mental, abuzu, abandonu no tratamentu seluk, ofensa ka explotaun, inklui abuzu seksuál, wainhira iha ninia inan aman nia liman, tutelar legál sira, ka kuakler ema ida ne'ebé tau-matan ba labarik sira."

Aleinde ne'e, iha artigu 34 hosi Konvensaun ne'e defini katak estadu partisipantes sira tenki foti medida atu fó protesau ba labarik sira hasoru forma hotu-hotu esplorasau seksuál no abuzu seksuál ninian.

Timor-Leste nu'udar estadu parte ba Konvensaun ne'e iha obrigasaun atu proteze labarik sira. Iha kazu ida ne'e, estadu liuhosi tribunál iha obrigasaun atu proteze vítima durante prosesu, tantu iha formulaun ba faktu sira akuzasaun, prosesu produsaun ba provas no desizaun.

JSMP mós preukupadu ho maneira deskripsaun no formulaun ba faktu legál sira hosi akuzasaun Ministériu Públiku. Iha akuzasaun ne'e deskreve katak arguidu husu ba lezada atu halo relasaun seksuál ho lezada. Ba JSMP, labarik ho idade tinan 4 nunca bele aseita katak nia iha kapasidade atu intende konverzasaun sira hanesan ema adultu.

JSMP hanoin katak tantu Ministériu Públiku no Tribunál, falla atu kumpriende labarik sira nia situaun no natureza infántil no oinsa bele fórmula linguazen ba prosesu ruma tuir labarik sira nia kapasidade no koñesimentu.

JSMP konsidera katak desizaun kazu ne'e minimu tebes no la refleta ba gravidade no konsekuensia psikolojia ne'ebé vítima infrenta nune'e JSMP husu ba Ministériu Públiku nu'udar na'in ba asaun penál atu rekursu kontra desizaun ida ne'e.

Kazu ne'e rejista iha tribunál ho Nuc: 0054/15.LILIQ. Julgamentu akordaun ne'eprezide hosi representante juis kolektivu, Dra. Francisca Cabral. Ministériu Públiku representa hosi Dr. Nelson de Carvalho no arguidu hetan defeza hosi Dr. Manuel Sarmiento hosi Eskritóriu Defensória Públiku.

Atu hetan informasaun kompleitu bele kontaktu ba:

Luis de Oliveira Sampaio

Diretór Ezekutivu JSMP

E-mail: luis@jsmp.minihub.org

Telefone: 3323883 | 77295795